

A la tschertga d'in sistem electoral optimal

La regenza vul midar l'incumbensa dal deputà Bruno Claus davart l'adattaziun dal sistem electoral per il cussegl grond

DA MARTIN CABALZAR

■ **La regenza è pronta da preparar ina missiva per adattar il sistem electoral per il cussegl grond sinaquai ch'el correspundia a la sentenza dal Tribunal federal. Tenor la regenza sto il sistem electoral futur esser stabil, transparent, chapaivel e conform a la lescha.** «En spezial sto el resguardar la diversità geografica (valladas), culturala, economica, linguistica, sociala e confessional da noss chantun e garantir che questa diversità vegnia era represchentada correspundentamain en il cussegl grond», scriva la regenza en sia posiziun concernent l'incumbensa dal deputà *Bruno Claus* (pld Cuira) ch'è vegnida signada da betg main che 73 deputadas u deputads. Cunter il sistem d'elecziun actual avevan 54 personas privatas sco era tschintg partidas politicas activas en il Grischun fatg recurs tar la Dretegra administrativa dal Grischun sco era tar il Tribunal federal a Losanna.



Cun in'incumbensa parlamentara vul deputà Bruno Claus (pld Cuira), sustegnì da betg main che 73 deputadas e deputads, realisar in sistem electoral maschadà tar las elecziuns dal cussegl grond.

FOTO O. AEBLI-ITEM

La sentenza dal Tribunal federal
Cun la sentenza dals 29 da fanadur 2019 ha il Tribunal federal constatà che la procedura da maiorz che vala actualmain en il chantun Grischun per las elecziuns dal cussegl grond correspundia per gronda part – dentant betg en tuts regards – a las pretensiuns dal dretg costituzional. Incompatibla cun la Constituziun federala è per il Tribunal federal l'applicaziun dal sistem electoral da maiorz en il circul electoral il pli pitschen dad Avras ed en ils sis circuls electorals cun la pli gronda populaziun sco Cuira, Tschintg Vitgs, Engiadin'Ota, Razén, Tavau e Glion. Tar il cumin d'Avras renviescha il Tribunal federal la disparità tranter la forza da las vuschs e la represchentaziun en il parlament, e tar ils ulteriurs cumins l'egualità

dad da la valur dal success. Il Tribunal federal supplitgescha perquai las autoritads cumpetentas dal Grischun – en il senn d'ina decisiun d'appel – da stgaffir en vista a las proximas elecziuns dal cussegl grond da l'onn 2022 in urden electoral conform a la costituziun e che resguarda era las ponderaziuns giudizialas.

Cumbinaziun da maiorz e proporz
Sco quai che l'incumbensader principal Claus accentuescha en sia argumentaziun constatescha la sentenza expressivamain che la procedura electorala da maiorz n'è betg contestada per 32 dals 39 circuls electorals. Tenor Claus stat en

quests circuls alura era per ina gronda part da la populaziun la personalità da las candidatas e dals candidats en il center e betg l'appartegnientscha ad ina partida. Uschia haja il Grischun era pliras pussaivladads d'adattar ses sistem electoral. D'ina vart possia vegnir mantegnida la procedura electorala da maiorz, sch'il circul d'Avras sco circul electoral il pli pitschen vegn engrondi e sch'ils circuls electorals memia gronds vegnan correspondentamain dividids en unitads electorals pli pitschnas. Tenor ils incumbensaders duai consequentamein vegnir elegì en ils 32 circuls electorals incontestads vinavant tenor la procedura electorala da

maiorz. Damai che la represchentananza da nossas linguas, da nossas vals, da nossas regiuns e da nossas culturas en il parlament chantunal sajan indispensablas per il Grischun, stoppia l'introducziun dal proporz vegnir impedita, argumenteschan ils incumbensaders apparentamain unisono.

Betg sa restrenscher memia baud a models concrets

La regenza affirmscha bain l'argumentaziun dals incumbensaders. Per la regenza èsi dentant impurtant che quest process d'adattaziun fitg pretensius dal sistem electoral possia vegnir prendì per

mauns cun resguardar tant las pussaivladads menziunadas dal Tribunal federal, ma senza sa restrenscher memia baud a models concrets. Il sistem electoral per il Grischun duai vegnir tschertgà sin basa d'ina vasta analisa e d'ina preschentaziun generala ed averta. En quest process stoppian vegnir sclerids pli detagliadamain ed en spezial ils models dal sistem electoral favurisads en l'incumbensa. Cun questa chaschun duain era vegnir preschentadas variantas da quests models. En cas da systems electorals da maiorz e maschadads sa dettia er en plirs regards novas pussaivladads concepziunals che duain vegnir examinadas concernent lur giustificaziun e funcziunalità per las relaziuns grischunas.

I fa prescha

En in proxim project da consultaziun duai il resultat da questa evaluaziun alura vegnir preschentà avertamain. Il model concret ch'è da favurisar ord vista da la regenza duai alura vegnir mess en discussiun, eventualmain era cun pliras variantas, scriva la regenza.

Ella punctuescha plinavant ch'il discurs politic davart «il dretg sistem electoral» duaja uschia pudair vegnir fatgs en enconuschientscha dals fatgs e da differentas pussaivladads, sco er en ina valitaziun objectiva da las consequenzas respectivas. Tenor avis da la regenza garantesch quest proceder meglier ch'i possia vegnir chattà in sistem electoral ch'è bun per il chantun Grischun e quai tant ord vista giuridica sco politica.

La regenza è persuadida che questa schanza vegniss manchentada sch'ins sa concentrass gia uss – sco pretendì en l'incumbensa – mo sin tscherts models. Ella propona perquai al cussegl grond da midar l'incumbensa Claus en quest senn.